



Na suđenju Srpk Pustivuku, svjedok Sudskog vijeća Državnog suda kazao je da u maju 1992. godine nije bio u selu Gornja Bioča (općina Ilijaš), gdje su, prema optužnici, ubijena dva, a ranjena tri civila. Zoran Crnogorac je ispričao da je tokom 1992. godine boravio u kasarni Misoča (općina Ilijaš) kao “rezervista” te da je vikendom odlazio kući u Bioču, ali da je optuženog Pustivuka rijetko viđao.

Odgovarajući na pitanja Sudskog vijeća u vezi s napadom na civile u selu Gornja Bioča, Crnogorac je rekao da ne zna ko je učestvovao u tome, istaknuvši kako nikada nije bio na “biočkom ratištu”. “Jedino što sam čuo od drugih jeste da su neke kuće bile zapaljene i da je Srpk iz njih izvlačio ranjenu djecu... Navodno je to neko kamerom snimao”, kazao je svjedok.

Naredno ročište zakazano je za utorak, 22. novembar ove godine.

Tužilaštvo BiH tereti Pustivuka, bivšeg pripadnika Stanice javne bezbjednosti (SJB) Ilijaš, da je 29. maja 1992. godine, ili približno tog datuma, s drugim pripadnicima vojske i policije Srpske Republike BiH učestvovao u napadu na civile u selu Gornja Bioča. U optužnici se navodi da su tom prilikom ubijena dva, a teško ranjena tri civila, od kojih je dvoje bilo maloljetno. Tužilaštvo BiH tereti Pustivuka i da je tokom maja i juna 1992. učestvovao i u nezakonitom zatvaranju civila Bošnjaka, koji su pritvarani u logore i druge zatočeničke centre.

Svjedok Crnogorac je na ovom ročištu ispričao da je tokom rata u Hrvatskoj i BiH dva puta ranjavan, naglasivši kako nije imao povreda po rukama i nogama. “Najprije sam ranjen u leđa, na ratištu u Vukovaru i Borovu Selu, gdje sam ratovao kao dobrovoljac. Drugo ranjavanje bilo je 1993. godine u Misoči, kada mi je povrijeđeno oko i uho. Prebačen sam u Beograd na Vojnomedicinsku akademiju (VMA)”, rekao je Crnogorac, istaknuvši kako nakon posljednjeg ranjavanja nije bio vojno angažovan.

Crnogorac je također kazao da su ga mještani sela Gornja Bioča najčešće zvali nadimkom Čana, a rijetko Zoka.

Optuženi Pustivuk je na prethodnim ročištima, svjedočeći u svoju korist, ispričao da je na dan kada je izvršen napad, na poziv svoje uplašene rodbine, otišao u selo Gornja Bioča, te da je

tamo zatekao njemu nepoznatu vojsku. Pustivuk je kazao da je čuo kako je jedan od vojnika, kojeg su oslovljavali sa “Kapetan Zoran” i koji je bio ranjen u ruku, naredio ubistvo komšije čija je kuća bila zapaljena.

Birn Justice report

[Preuzeto sa www.ilijas.ba](http://www.ilijas.ba)